

Powšitkowne WOZJEWJENJA

njedźelu, 4. februara 2018

Kubłanske dny serbskeje młodžiny

Worklečanske dekanatne dušepastyrstwo młodžiny zarjaduje wot pjatka do njedźele, 2. do 4. měrca, kubłanske dny serbskeje młodžiny w Schmiedebergu. Přizjewjenja k tomu přijimuje wone hač do štwórtka, 22. februara, z mailku na don.boskowy-dom@t-online.de abo telefonisce pod čisłom (03 57 96) 9 55 95.

Za mandželske seminary hišće přizjewjenje móžne

Za pory, kotrež chcedža so přichodnje zmandželić, poskičuje Worklečanske dekanatne dušepastyrstwo młodžiny seminary. Přichodnej wotmějetej so pjatk a sobotu, 23. a 24. februara, kaž tež pjatk a sobotu, 23. a 24. měrca. Pjatk traja wone wot 18 do 22 hodž., sobotu wot 9 do 17 hodž. Přizjewjenske formulary, kotrež su w cyrkwjach wupožene a pod www.posol.de wozjewjene, měli so wupjelnjene hač do pjatka, 9. februara, na scěhowacu adresu pósłać: Dekanatne dušepastyrstwo za młodžinu, Młynski puć 4, 01920 Workleczy. Dalša móžnosć je, formular z mailku na don.boskowy-dom@t-online.de abo z faxom na čisło (03 57 96) 9 55 95 pósłać.

Wo zabytych literarnych twórbach serbskeho fararja

Literarny wječork pod temu „Jurij Winger 1872–1918 – njeznaty“ wuhotuje Towarstwo přećelow Smolerjec kniharnje štwórtk, 8. februara, w 19.30 hodž. w Budyšinje na Sukelnskej 27. Dr. Franc Šěn porěči wo zabytych literarnych twórbach fararja, spisowacela a přeložowarja Jurja Wingerja. Přitomni budu jeho burske powědančko „Što je wina?“ słyšeć. Předwidžane spominanje na fararja a spisowacela Jurja Wingerja 27. februara w Chrósćicach so na 1. meju přestorči.

Duchowna hudźba w Budyšinje

„Mjez pósťnicami a pósťnym časom“ rěka tema Duchowneje hudźby njedźelu, 11. februara, we 18.00 hodž. w Budyskej cyrkwi Našeje lubeje Knjenje. Zaklinča psalmowe spěwy wot Antonína Dvořáka a overcross-improvizacije. Duchownu hudźbu wohotuja Franciska Dillner-Koch, sopran, Friedemann Böhme na piščelach, Jan Brězan na gitarje a klawěrje, Józef Brězan na gitarje a Maks Schneider na cajonje. Zastup je darmotny. Wšitcy su wutrobnje přeprošeni.

Zhromadny dzeń za 3. a 4. lětnik

Dekanatne dušepastyrstwo přeprošuje džěci 3. a 4. lětnika štwórtk, 22. februara, wot 9.00 do 15.00 hodž. pod temu „Pósťny čas a mój wopor?“ do Don Boskoweho domu we Worklecach. Zajimcy njech so prošu hač do pónđzele, 12. februara pod telefonowym čisłom (03 57 96) 8 87 07 abo přez mailku na workleczy-kise@gmx.de přizjewja. Za wudawki dnja zběra so wobdžělenski přinošk we wysokosći štyrjoch eurow.

Žohnowanske modlenje w chorowni

Vincenc Böhmer, katolski dušepastyr Kamjenskeje chorownje maltezew swjateho Jana poskićuje přichodnje žohnowanske modlenje za žony a muži, kotřiž přeja sej dźěćo, za tych, kotřiž so na porod dźěsća wjesela kaž tež staršim z nowonarodženymi. Tajke modlenje za muži a žony z přećom za dźěsćom kaž tež za staršeju w času samodruhosće budže srjedu, 7. februara, we 18 hodź.

Dźědojo a wowki z wnučkami

Na prózdninski tydžeń dźědow a wowkow ze swojimi wnučkami přeprošuje Smochčanski Dom biskopa Bena wot póndžele do pjatka, 19. do 23. februara. Lětuša tema rěka „Boža pisana stwórba“. Přizjewić móža so zajimcy pod telefonowym čisłom (035935) 22 316 abo z mailku pod paedagogik@benno-haus.de.

Swobodne dźělowe městno

W Domje swjateje Ludmile w Chrósćicach poskićamy dźělowe městno k dohladowanju wobydlerjow. Městno ma so z 20 hodźinami wob tydžeń wobsadzić. Přizjewić smě so kóždy, kiž so rady ze staršimi ludźimi zaběra. Nadrobniše informacije dóstanjeće pola wjednistwa domu wosobinsce abo pod telefonowym čisłom (03 57 96) 9 47 30.

Wendelin Brězan, nawoda

Atraktiwne dźěło ze zbrašenymi

Za spěchowanje duchownje zbrašenych pyta Dom swjateho Jana w Smječkecach fachowu móc z kwalifikaciju ergoterapeuta, fyzioterapeuta abo hladarja respektiwnje kublarja zbrašenych. Dźělowy čas je mjez 7.30 a 16.00 hodź. Městno ma so 1. apryla wobsadzić, a to najprjedy na wobmjezowany čas. Swoje požadanje měli zajimcy hač do srjedy, 28. februara, na adresu Dom swjateho Jana, Janska 1, 01920 Smječkecy, pósłać.